

平定羅刹方略

爾薩城爲巢穴于其四近耕種漁獵數擾索倫赫真斐雅
喀奇勒爾居民掠奪人口俾不得寧處

上乃深爲籌度謂若輩非創以兵威則罔知懲畏將至蔓
延遂決意征剿先遣副都統郎坦公朋春等率官兵往達
呼爾索倫聲言捕鹿因以覘視羅刹情形郎坦等將
上面諭之曰鄂羅斯國所屬羅刹犯我黑龍江一帶伊
虞人戕害居民前發兵進討未獲翦除历年已久近聞蔓
延益甚過鈕滿恆滾諸處至赫真斐雅喀虞人住所殺掠
不已爾等此行除自京遣往參領侍衛護軍外令畢力克

圖等五台吉率科爾沁兵百人寧古塔兵八十人至達呼爾索倫一面遣人赴泥布楚諭以捕鹿之故一面詳視陸路近遠詔黑龍江行圍徑薄雅克薩城下勘其居址形勢度羅刹斷不敢出戰若以食物來餽其受而量答之萬一出戰止勿交鋒但率眾引還朕別有區畫爾等還時計視自黑龍江至額蘇哩丹行水路及已至額蘇哩其路直通寧古塔者更擇隨行之參領侍衛同薩布素往覘之

諭畢

賜郎坦朋春御衣弓矢隨行者亦量加賞資

十二月戊子

命戶部尙書伊桑阿赴寧古塔督修戰

艦時鎮守寧古塔等處將軍巴海等以寧古塔戰艦稍有損敗請發物料用資修整工部議如所請

上諭修整戰艦所關甚重其令戶部尙書伊桑阿往董其事

庚子 命將軍巴海等帥師往駐愛琿呼瑪爾 耶坦等以羅刹情形具奏

上諭議政王等曰據耶坦等奏攻取羅刹甚易發兵三千足矣朕意亦以爲然第兵非善事宜暫停攻取調烏拉寧古塔兵一千五弁置造船艦發紅衣炮鳥槍及教之演習

者于愛琿呼瑪爾二處建立木城與之對壘相機舉行所需軍糧取諸科爾沁十旗錫伯烏拉之官屯約得一萬二千石可支三年且我兵一至卽行耕種不致匱乏愛琿城距索倫村落不遠五宿可到其間設一驛俟我兵將至精奇哩烏拉令索倫皆接濟牛羊甚有裨益如此則羅刹不得納我逋逃而彼之逋逃者且絡繹來歸自不能久存矣爾等其詳議以聞議政王等奏言羅刹據我邊界納我逋逃擾亂已久宜卽行殄滅

皇上好生之心聽其自斃

諭言允當應一一遵行又

如郎坦等所請造船五十六艘所調兵預爲派定俟船成糧足卽令起行目前烏拉官屯乏糧戶部理藩院各遣官一員往錫伯瓜爾察地方採買統兵大臣恭候 欽簡

疏入

上命鎮守寧古塔等處將軍巴海副都統薩布素統兵前往餘悉如議

康熙二十二年三月庚戌

命造船運糧松花江

上諭大學士覺羅勒德洪等曰饋運烏拉軍糈自遼河溯流運至等色屯隨用蒙古之力陸路運至伊屯門自伊屯

門船載順流運至松花江甚善內府佐領下屯莊糧米充足需用幾何卽以屯丁之力運至遼河津要船載趣運并備畚具椿木若逢淤淺束水以行糧米或于等色屯伊屯門伊屯口或于戛河口築倉收貯船在邊內我兵衛送邊外蒙古兵衛送宜少載糧米多備挽夫俾船行輕利兩河中阻陸路酌派車載其船準河式置造辦糧需用若干爾等于戶工二部理藩院及郎坦觀圖詳議至造伊屯門以北運船運至松花江及築倉收貯事宜應否交與留鎮烏拉副都統其并定議以聞勒德洪等議于巨流河渡口造

船六十艘以長三丈寬一丈爲度每船載米百石用水手
六名水手卽派民夫操演自起運日每人月給銀一兩運
到米于巨流河渡口等色屯築倉收貯悉交與盛京將軍
大臣等監理船在邊內酌派盛京官兵衛送自等色屯至
伊屯門派蒙古車輛陸續運往所派蒙古官兵車輛理藩
院另行請 旨伊屯門諸地築倉貯米及造伊屯河運
船運至松花江悉交與畱鎮烏拉副都統議覆
上以所議尙未周詳遂分遣內府營造司郎中佛保及戶
部侍郎宜昌阿等以瀛台通州船載米試之復令盛京刑

部侍郎噶爾圖等自巨流河至等色屯驗試遼河深淺
藍古塔副都統瓦里虎等自伊屯口至伊屯門伊爾門河口
驗視水勢尋噶爾圖奏遼河可行三丈之船請以此式于
巨流河渡口造船六十艘瓦里虎奏伊屯河可行三丈五
尺之船吉林地方伐木造船百艘由伊屯河運米松花江
于伊屯門伊屯口築倉收貯

上允之又

諭前薩布素來奏明年六月前兵食伊等

賁行餘悉存留爾時曾諭以六月後所需運黑龍江松花
江交匯處令其遞取今應于烏拉造大船五十艘或以薩

布素等所留家古錫伯米或以盛京所發米計口運往烏
拉寧古塔兵皆貧乏現在出兵者半任輸輓復用餘兵恐
至困苦烏拉席特庫所屬八家獵戶停獵一年令其輸輓
庶兵力稍紓黑龍松花兩江交匯處自吉林順流而往薩
布素等自彼駐兵之所順流而來水路遠近相等俟明春
冰解卽運兩江接界令薩布素等量發官兵船艘前來迎
取

戊辰 命給烏拉官兵行糧之車 將軍巴海等請給
出征烏拉官兵及執事人行糧戶部議官兵各交額糧一

月至每月行糧毋庸給發疏入

上命給行糧之半

四月丙子

遣理藩院尙書阿穆瑚瑯等往烏宋穆秦

諸處

上諭議政王等奏今我兵移駐黑龍江當乘此發烏宋穆秦兵聲言捕鹿以疑羅刹復遣大臣一員至索倫預備軍需亦聲言捕鹿人將至其令理藩院尙書阿穆瑚瑯往烏宋穆秦阿達哈哈番馬喇往索倫

己卯

命將軍巴海留鎮烏拉副都統薩布素等領兵

駐額蘇哩 先是令烏拉寧古塔兵往駐愛琿呼瑪爾尙
未啟行尋尙書伊桑阿以造船赴寧古塔

上命傳諭巴海等兵抵黑龍江應駐何地其詳議以聞至
是巴海等奏言愛琿呼瑪爾距雅克薩城遼遠若駐兵及
此則勢分道阻難于防禦且過雅克薩有尼布楚等城羅
刹倘水路運糧增兵救援更難爲計宜乘其積儲未備速
行征剿況羅刹殺我斐雅喀居民畱嫚書而去俟造船畢
度七月初旬能抵雅克薩卽親統大兵直薄城下宣諭招
撫否則駐劄墨克項諸地卽遣官兵與奉

命赴羅刹

甲士宜番馳至雅克薩宣諭兼觀其形勢若何再議進止
機宜令宜番一弁奏聞烏拉官兵乘往馬匹恐長途疲羸
不任馳驅索倫邊墨克項宜令選肥馬五百匹送呼瑪爾
河口酌量給用議政王等議如巴海等所請

上諭所議進征羅刹軍務殊爲疎略烏拉寧古塔兵未經
征戰不諳行陣紀律將軍巴海及副都統官兵又彼此不
合巴海其畱守烏拉薩布素瓦禮祜俱以副都統領兵前
往不必授爲將軍至所議七月兵到卽行攻戰亦屬未可
俟抵彼相度形勢奏請可進之時京城每旗精簡五十人

參以軍前獲罪人員委授夸蘭大參領別遣將由陸路直趨五旬可達我兵至冬時攻戰乃能有濟若今冬不便克取來夏令烏拉寧古塔兵仍往彼地或令撤還至期約行又郎坦言取馬蒙古不能卽得可選兵部上駟院肥馬二千匹于本年七月內預發索倫地方牧放俟禁旅到後畱其羸馬更以所備肥馬乘往其傳集郎坦朋春再議于是議政王等奏

上諭深中事宜固應祇遵但前奉暫停攻取相機舉行之旨尤爲切當烏拉寧古塔兵不須往墨克項勘得愛

一
琿呼瑪爾之間額蘇哩地方可以藏船且有田隴舊跡卽
令大兵建立木城于此駐劄宜番回自羅刹再議派京師
兵或撤烏拉寧古塔兵至巴海畱守烏拉薩布素瓦禮祐
統兵以行及預備馬匹于索倫悉應遵 旨額蘇哩索
倫村莊之間應設四驛令赴索倫理藩院大臣董其事
上報可

六月甲戌 命馬喇等市易牛羊諸物以備軍需 馬
喇等奏以茶布市易

上諭茶布不必攜往可于戶部支銀四千兩量買諸物馳

驛抵彼換取牛羊糧米以備軍需勿得脅制民間各任其便

七月甲申

命軫恤所獲羅剎

上諭兵部奏事章京南岱攜至羅剎二人所司加意培養時其飲食毋得缺乏以示軫恤之意

戊戌

命理藩院作書宣諭羅剎

先是馬喇等奏索

倫總管博克等所獲羅剎及軍前招降者共選王人遵

旨送京餘二十六人皆迫于大兵始行投誠索倫距羅

剎近不宜久畱應一律解至議政王等

詔送交戶部

安插博克等所獲宜番米海羅莫海對二人賞以衣帽迎至薩布素處放還請

敕理藩院作書卽令宜番等持

去其書略云前遣孟格德等至尼布楚曾與爾約各毋收納逋逃弁以先年逸去根特木爾歸我乃背前約入我地抗害達呼爾索倫焚劫艾雅喀奇勒爾今故命將出師永駐額蘇哩爾若離我邊境還爾本土以逋逃來歸則已否則我亦納爾逋逃卽往來之人亦必擒戮疏入

上從之

九月丁丑

命烏拉等處官兵永戍愛琿 先是副都

統薩布素等奏冬時進征礮具軍糈輸運維艱倘遇大雪亦未便用兵今冬可暫駐額蘇哩俟來年四月冰解卽往攻雅克薩城事下議政王等貝勒大臣集議議政王等奏言前奉暫停攻取相機舉行之

旨允宜薩布素請于

來年四月進征毋庸更議

上諭我兵旣命永成額蘇哩應派烏拉寧古塔兵五六百人達呼爾兵四五百人于來秋同家口發往設將軍副都統協領佐領等官鎮守深爲有濟至來年運錫伯諸地糧米于額蘇哩止用獵戶必致稽遲薩布素等業以來年六

月前兵食去外今又停止應量發薩布素等軍前水手由陸路直往錫伯俟來年冰解與獵戶協運可否如此施行令郎坦馳驛速往薩布素等處確議尋薩布素等奏額蘇哩今年七月既經霜雪烏拉寧古塔兵家口若令來秋遷移恐地寒霜早諸穀不獲難以餬口應于來春就遷移達呼爾兵五百人先赴額蘇哩耕種董其秋收再遷家口以烏拉寧古塔三千餘兵分爲三班將軍副都統等更番統領駐防議政王等議如所奏

上復諭曰如果薩布素等所奏兵丁頻事更番必致困苦

非久長之策其在愛琿建城永戍豫備礮具船艦令設斥
堠于呼瑪爾自愛琿至烏拉置十驛驛夫各五十人遇有
警急乘蒙古馬疾馳尋常事宜則循十驛以行由水路陸
續運糧積貯愛琿此兵既往且立之業仍設將軍副都統
領之如羅刹船由黑龍江下我興師尾擊甚易況愛琿地
勢遼闊照內地置十驛又易安置家口如此一一區畫則
羅刹自窮感歸誠矣其遣理藩院郎中額爾塞至薩布素
確議以聞至是薩等奏永戍愛琿諸務

上諭周詳悉宜遵奉但來年遷移兼以築城屯田力不能

支請發烏拉寧古塔兵二百人協力築城工竣卽回

上諭烏拉寧古塔兵別有調遣毋得發往令副都統穆泰率盛京兵六百人于來年三月抵彼處築城器具悉備以行餘一如前議未幾兵部列應補將軍副都統人名具奏上因命薩布素爲鎮守愛琿等處將軍禮部侍郎溢岱工科給事中雅齊納爲副都統

十月甲子

遣官勘視設驛地方

戶部奏愛琿至烏

拉須設十驛但設驛之地不行相度難以懸議應俟來年三月雪消遣戶兵二部理藩院官各一員並令寧古塔將

軍選熟知地勢者陪行就近派郭爾羅斯二旗杜爾伯特
一旗嚮導各二人詳加丈量

上允之尋遣戶部郎中包奇兵部郎中能特理藩院郎中
額爾塞前往

十一月癸酉

命增造船艦運糧于愛琿

尙書伊桑

阿等奏奉

命議運糧愛琿事宜

臣

等議烏拉造船五

十艘除將軍薩布素所發水手一百五十人再派烏拉兵
二百獵戶四百俟明年冰解時卽以伊屯口錫伯米每船
載五十石并副都統穆泰兵三月坐糧運至愛琿二十四

年應運者于前項水手內添發烏拉兵六百運送

上諭應增船艦并運二年食糧二十四年不必運送其再行確議以聞又議二年食糧一次全運船五十艘不足應增造三十每船設運丁十五人其需一千二百人除薩布素處所發水手一百五十人再添烏拉八旗獵戶一百九十甯古塔兵三百六十選才能協領等官督運愛琿

上從之復 諭所發獵戶甚多其令總管特庫轄之前

往兵丁獵戶水手各給餉一月

戊寅 命防禦羅刹

上諭理藩院曰羅刹增發人衆亦未可料其移文馬喇等加意防禦不時偵探應奏事速行奏聞

癸未 命授投誠羅刹吉禮過里等官 將軍薩布素

等奏牛滿河之奇勒爾奚魯噶奴等殺十餘羅刹攜其妻子來歸俄樂春之朱爾鑑格等于精奇哩烏拉殺五羅刹并獲其鳥鎗馳報又聞斐雅喀之人擊殺羅刹甚衆應乘此時酌給新投誠羅刹吉禮過里鄂佛那西馬克西木等官職舊投誠羅刹宜番鄂爾噶番席圖頒三人効力勤勞亦宜給以官職

上諭宜番近已授驍騎校鄂爾噶番席圖頒及新投誠之吉禮過里鄂佛那西馬克西木俱授七品官其新投誠羅刹內鄂佛那西費禮普令馳驛至薩布素處酌遣招撫時值沍寒并以裘帽賜之

十二月丙辰 命運米科爾沁漠爾渾屯

上諭大學士覺羅勒德洪等大兵現駐黑龍江所需軍食雖已運送而科爾沁之漠爾渾屯亦宜多備造倉儲積其令戶部理藩院同吏部尙書伊桑阿詳議以聞議于漠爾渾屯運米一萬石存貯其米自包衣屯莊撥給運費于盛

京戶部動支工部遣官至漠爾渾屯監造倉米至交彼處
都統加意守護
上報可

平定羅刹筆記卷一終

平定羅刹方略卷二

康熙二十三年正月乙酉

命將軍薩布素等遣官兵

剿撫牛滿羅刹

薩布素等奏牛滿羅刹抵恆滾同來自

北海之羅刹與費雅喀戰退居河洲若不速計剿撫則赫

真費雅喀奇勒爾人民必被殘害且恐羅刹復增發前來

宜乘四月冰解時卽遣夸蘭大二員率官兵三百人并發

紅衣礮四具令附近恆滾口費雅喀噶克當阿等嚮導抵

羅刹所據地先行招撫不卽歸降則進剿滅如羅刹聞風

先遁所發之兵卽乘機安輯赫真等處人民未經來附者

亦招撫之

上報可

二月辛酉

命送投誠羅刹至京安插

將軍薩布素

等奏夸蘭大鄂洛誠等今年正月十一日抵羅刹地方遣
宜番等造其居開諭之先取其烏槍二十具并俄樂春畱
質之子三人遂招撫羅刹米海羅等二十一人

上命遞送米海羅等至京交戶部安插其烏槍及先投誠
羅刹之烏槍一并送至押解官兵過多恐致驛遞勞苦令
酌量派遣

四月己亥

命增給愛琿官兵行糧 將軍薩布素等

請發今年四月後官兵一年行糧戶部議照前給以半年俟愛琿駐防兵家口到日停其給發

上諭官兵勞苦半年行糧全行給發

五月甲申

命將軍薩布素等取羅剎田禾 馬喇等

奏

臣

至索倫屢密詢羅剎情形皆云現在雅克薩尼布潮

二城各止五六百人其得以盤踞多年者惟賴額爾古納口至雅克薩十餘處雅克薩至布爾馬夫河口十餘處築室散處耕種自給因以捕貂尼布潮田畝不登但取資納

米雅兒諸姓貢賦喀爾喀巴爾呼人時販牲畜等物至尼布潮尼布潮人亦捕貂與之交易得以生存至得冷白地方耕種田畝無幾且不通水路麪食等物雖零星負載亦不足恃及問從尼布潮逃回之布赫德云舊納米雅兒新納米雅兒托空臥兒徹爾克吉兒巴林喀吉兒夸諾兒破塔噶兒巴牙噶兒等八姓之人并我根特木爾黨內逃人亦同被遊牧艮河額爾古納河等處臣請敕喀爾喀徹臣汗收其所部附近尼布潮者兼禁止交易再請款黑龍江將軍水陸並進作攻取雅克薩狀因取其田禾

則羅刹不久自困而伊屬索倫俄樂春諸姓人亦難以竊據再處量遣輕騎勦滅似易

上諭據馬喇等奏取羅刹田禾當不久自困又侍衛關保來奏將軍薩布素等亦以取羅刹田禾爲然則羅刹盤踞雅克薩尼布潮惟賴耕種若田禾爲我所取誠難久存其令薩布素等酌議或由陸路進或水陸並進盡刈其田禾不令收穫由陸路進以所刈之禾投江下流水陸並進以所刈之禾船載以歸於未進兵時先遣人傳示羅刹云爾等據我雅克薩尼布潮多歷年所屢令撤還遷延不去且

收我逃人侵我邊民今大兵水陸進勦爾其速退以保餘生并如馬喇等奏移文徹臣汗知之

七月辛巳

命將軍薩布素等偵探羅刹情形 馬喇

等奏_臣等遣打虎兒副頭目倍勒兒等偵探雅克薩城情形路遇羅刹殺其二人生獲一人據生獲之費要多羅云大兵未來之先雅克薩城已加修造昨歲聞大兵進發城外復增木欄所在農人盡調入城內打獵收貂亦皆罷止田禾未熟卽行刈穫因今春不見兵至遂於旁口一帶仍舊遣人耕種昂古墨阿山頂設五人更番瞭望今夏自尼

布潮復增發四百人計見在雅克薩者約九百人在尼布
潮者不知其數雅克薩設丁壯八十人耕種以收穫之糧
支給兵食每月人各一斗餘悉造房收貯一遇歉歲不能
如數支給在前豐歲僅僅足用今已增人諒必不敷雅克
薩舊有船八艘吉禮過里等運糧前行被大兵擒獲故雅
克薩無船大兵未來於野諾西納城內復造船二百艘各
城派兵運糧不知兵數多寡并運往何處吉禮過里黨內
人逃回雅克薩云大兵勢盛戰艦絡繹不絕眾驚失措今
自尼布潮增發人眾大兵進時不知時勢若何又據釋歸

之人云投誠者

聖主悉免死且加恩賞此外別無人

至等語其生獲羅刹一并解送疏入

上諭雅克薩增發羅刹或欲侵害我虞人其移文薩布素等時加偵探相機以行倍勒兒等理藩院照例獎賞送到羅刹交戶部安插

十月甲辰

命運烏喇等處糧米於愛琿將軍薩布

素等請定官兵人數以便給糧戶部酌定人數并奏二年需糧共計四千八百七十石有奇以見存四千五百七十石發給其不敷者藉愛琿人力將達呼爾所存米動支運

往

上諭愛琿所須糧停其自達呼爾運往將烏喇米九百七十石見自等色屯轉輸伊屯門米一千五百石於明年冰解時再發船一次運往

十二月乙巳 命選擇藤牌官兵

上諭兵部征勦羅刹所需藤牌官兵應分遣司員至山東河南山西三省於安插墾荒福建投誠官兵內選擇善用藤牌願行効力五百人令地方大臣給銀贍其妻子兼爲整裝遣行又傳令八旗漢軍察明福建等處投誠官兵內

善用藤牌及滾口長刀者勿論主僕開列職名并器具送部其在天津鄭克塽馮錫范諸處亦遣人察取前項人員器具尋又諭聞福建有雙層堅好藤牌移文提督施

琅選取四百并長刀速送至京毋誤軍機

康熙二十四年正月癸未

命都統公朋春等帥師勦

撫羅刹先是將軍薩布素等奏大兵駐臨邊地宜水陸並進取羅刹田禾但臣軍糧自六月初三日以次運到給糧治裝約至初十始將啟行聞羅刹降人俱言雅克薩早熟諸禾彼時暫行收穫今奔流而上值霖雨之期江水泛

溢無常陸路亦復泥濘縱令疾行非一月不到是則取禾
無及徒勞士馬況城池廬舍修築未成迨至回時正值天
寒難於興作請暫停今歲興師俟來年四月內增兵進取
雅克薩城

上諭前馬喇等請取羅刹田禾朕令或由陸路或由水路
並進相機舉行敕諭甚明及遣關保前往薩布素亦云可
行如果遵奉則我師不勞而羅刹自困今薩布素等坐失
機宜託故具陳殊屬不合且聞羅刹田地肥沃收穫豐裕
若異時兵抵雅克薩城下與之相持又將以羅刹糧多難

於卽克爲辭久稽時日其不取田禾坐失機宜情節令薩布素明白奏覆尋薩布素等上疏引罪議政王等議於事平嚴議今仍遵前 旨來年乘羅刹田禾時進兵

上命都統公瓦山侍郎果丕往黑龍江與薩布素等詳議應否攻取雅克薩城并作何舉行擇其有裨於事者以聞至是瓦山等與薩布素會奏我兵來年四月杪水陸並進抵雅克薩招撫不行納款則攻其城倘萬難克取卽遵前 旨毀其田禾以歸議政王等議如所奏復請 敕

直隸山東山西河南巡撫每省派熟習火器兵二百五十

人并選賢能官各四員豫備火器送京師至日增發薩布素軍前協攻雅克薩城

上諭議政王等疏內不請發禁旅良是但直隸各省綠旗兵未厯戰陣且黑龍江火器甚多不須增用朕意選福建投誠善用藤牌官兵見在八旗及安插山東山西河南者五百人付臺灣投誠左都督何祐等率往薩布素一應咨題多屬支吾藉端延滯度四月進兵不過刈取田禾事必無成此皆遣發黑龍江狂悖之人從中阻議不欲成事薩布素出身微賤高視若輩毋敢有違用兵所關甚鉅宜周

詳籌畫期於必克倘謀事草率復似明安達禮等退兵羅刹將益肆披猖當時京城選賢能大臣一員統兵以行俟克取雅克薩之日班師又發盛京兵五百人代黑龍江兵守城種地出征兵還亦令還盛京種地事宜遣戶部大臣一員督理羅刹所云早熟之穀卽內地春麥今我兵亦多種春麥及大麥油麥霜降前六月皆得收穫則不因師出曠一年田功藤牌兵給馬二千匹帶往盛京盛京各佐領亦派馬二千照舊制嚴督飼秣候京城馬到更代北行至馬喇等所養馬皆豫備於齊查爾哈爾屯此間催趲月杪

可到聞此路間有缺水處不免貽悞今自盛京抵烏喇自
烏喇經新設驛站路直且近當從此徑抵黑龍江沿途馬
匹或有倒斃馬喇以所備者足數補送如此則我兵馬匹
無虞藤牌兵各給礮彈或十圓或二十圓以行其餉銀兵
月給二兩官月給三兩隨又

諭議政王等兵非善事

不得已而用之向者羅刹無故犯邊收我逋逃後漸越界
而來擾害索倫赫真費雅喀奇勒爾諸地不遑寧處剽劫
人口搶奪村莊攘奪貂皮肆惡多端是以屢遣人宣諭復
移文來使羅刹竟不報命反深入赫真費雅喀一帶擾害

益甚爰發兵愛琿扼其來往之路羅刹又竊據如故不送
還遁逃應卽翦滅今仰副 天心大兵逼臨雅克薩城

姑再傳旨羅刹云前屢經遣人移文命爾等撤回人眾以
遁逃歸我數年不報反深入內地縱掠民間子女搆亂不
休乃發兵截爾等路招撫恆滾諸地羅刹赦而不誅因爾
等仍不去雅克薩特遣勁旅徂征以此兵威何難滅爾但
率土之民朕無不惻然垂憫欲其得所故不忍遽加殲除
反覆告誡爾等欲相安無事可速回雅庫於彼爲界捕貂
收賦毋復入內地搆亂歸我遁逃我亦歸爾逃來之羅刹

果爾則界上得以貿易彼此安居兵戈不興倘執迷不悟
仍然拒命大兵必攻破雅克薩城殲除爾眾矣如此宣諭
後羅刹果回雅庫爲界卽駐師於愛琿設斥堠於雅克薩
令疆圉帖然否則大兵酌量進止不如此宣諭今縱克取
雅克薩城我進則彼退我退則彼進用兵無已邊民不安
可否舉行爾等其詳議之於是議政王等奏言

上諭周詳遵此舉行甚裨於事統兵督耕大臣恭候

欽簡疏入

上命都統公朋春統兵護軍統領佟寶副都統班達爾沙

參贊戶部侍郎薩海督耕朋春等抵黑龍江發往雅克薩
城文書用黑龍江將軍印

丁亥給馬喇副都統銜

上諭大學士覺羅勒德洪等馬喇遣用以來殊爲効力且
頗知雅克薩諸地形勢其授副都統銜參贊軍務 詔

責將軍薩布素等 戶部奏黑龍江佐領鄂色等言耕牛
倒斃已盡農器亦有損壞今時已東作遣理藩院官一員
同馬喇如數購買耕牛送往農器令薩布素等營造豫備
上諭薩素布等故毀農器盡斃耕牛其意在多方遲誤冀

撤離黑龍江耳凡受事者各宜殫心豫籌以期有濟詎可
諉之於上賴朕一切留意悉加區畫不致廢弛倘謂責有
攸歸竟倚任之定誤軍機宜卽嚴治今見同大兵進剿姑
暫停處分俟回自雅克薩日再議

戊子以科爾沁貢物犒黑龍江師

上諭議政王等科爾沁十旗今年進貢牛羊諸物不必來
京其全送黑龍江軍前仍記數奏聞照進貢例賞賚理藩
院卽傳令科爾沁知之

命鑾儀衛使侯林興珠等率

藤牌兵會勦羅刹 兵部奏察取善用藤牌者鑲黃旗咨

送鑾儀衛使侯林興珠應否發遣恭候

上裁又遴選上三旗兵一百七十人山東等三省官一百五人兵三百九十五人何祐尙未至應於官兵內委用首領幾員各束約本省人前往上三旗各遣漢軍官一員暫爲管轄

上諭黑龍江軍糧關係緊要務籌永遠充足發往黑龍江管轄藤牌兵之官過多官量行派遣兵用四百名足矣且近冬時藤牌兵在彼無事每百人一次自蒙古地方馳驛發往不久卽到底軍糧不致耗費議政王等其詳議以聞議

政王等議選派官二十員兵三百八十名共足四百名之額兵部給官印劄以便約束令林興珠及何祐統兵以行上三旗各派漢軍賢能官一員管轄赴盛京付公朋春等率之進勦何祐至馳驛速去

上報可仍於官員外派足兵四百名尋諭大學士覺羅勒德洪等林興珠曾効力行間且係侯爵其令參贊軍務朋春等善視之

二月癸卯命送藤牌長刀于烏喇先是兵部以福建送至雙層藤牌三十單層藤牌三百七十呈閱

上諭藤牌稍薄雙層者加舊綿一層單層者加舊綿二層
庶堅固可用官兵卽於詰朝就道侯林興珠與營造司郎
中佛保監修進式後速發尋藤牌修畢兵部奏并福建送
至長刀四百遞解至烏喇公朋春等同侯林興珠酌量齎
行

上諭遞解藤牌關係緊要爾部派賢能官一員送至盛京
盛京之部派賢能官送烏喇

丙午

命賞賚何祐

兵部奏何祐至

上命內務府給何祐白金及堅厚緇甲于十八日啟行

四月乙未

命自墨勒根至雅克薩設立驛站

上諭議政王等愛琿前於是月啟行五月中旬可至雅克薩城凡奏報軍機自雅克薩至額蘇里經愛琿前來恐迂道遲延令理藩院侍郎明愛於杜爾伯特札賴特派兵五百人并索倫兵餉自墨爾根至雅克薩設驛奏軍機庶免貽悞明愛往來覺察驛夫糧食匱乏以索倫所貯米支給愛琿以內每驛原設三十人應核減一半并入蒙古若蒙古兵五百人過多再爲核減索倫効力勤勞傳諭異日加恩以示鼓勵

戊戌

命獎賞達呼爾副頭目倍勒兒等

馬喇等奏

臣等今年正月二十八日遣打虎兒副頭目倍勒兒等率三十餘人往雅克薩城北務擒其生口并詳勘情形以報三月初五日倍勒兒等生擒羅刹七人回云雅克薩城垣廬舍如故又據生擒羅刹噶瓦力喇等去歲雅克薩城內設立重木中實以土聞大兵至額蘇里卽遣人各處求援援兵千人今年二月前隊已至後隊未來去歲新到頭目額禮克謝傳諭人眾大兵來此皆爾等殺據所致自後再聞有侵抗索姓打虎兒者定行誅戮是以我等往來不敢

持軍器前者釋回二人已送往國主處迄今未得主命雅克薩兵眾不滿千人後增發者未知其數等語生擒羅刹逸去一人見在六人遞解至京

上諭倍勒兒等直抵雅克薩探其情形生擒羅刹可嘉所司如例獎賞其送至六人各給時服一襲送將軍薩布素處俟大兵進勦時示以寬大之意悉行釋放

六月癸巳侍郎明愛等奏官兵克雅克薩城 都統公朋

春等帥師進發五月二十二日抵雅克薩城下宣諭

皇仁浩蕩不忍加誅令還本境羅刹仍恃巢穴堅固遷延

不去二十三日分水陸兵爲兩路列營夾攻復移置火器營二十五日黎明急攻之城中大驚羅刹頭目里克舍謝等勢迫詣軍前稽首乞降於是朋春等復宣諭

皇上好生之德釋回羅刹人眾其副頭目巴十里等四十二人不願歸去因留之我屬蒙古索倫逃人及被擄者咸加收集雅克薩城以復明愛等遣人馳投會 聖駕幸拜

察在道理藩院尙書阿爾尼奏 聞

上顧阿爾尼曰征勦羅刹眾皆以路遠爲難朕獨斷興師致討今荷 天眷遂爾克之朕心嘉悅爾以捷音傳知

諸王大臣既至

行宮駐蹕恭親王常寧等率文武官

員請慶賀

上遣阿爾尼同兵部侍郎佛倫傳

諭曰治國之道期

於久安長治不可圖便一時當承平無事朕每殫心籌度
卽今征勦羅刹之役似非甚要而所關甚鉅羅刹抗我黑
龍江松花江一帶三十餘年其所竊據距我朝發祥之地
甚近不速加翦除恐邊徼之民不獲寧息朕自十三歲親
政卽留意於此細訪其土地形勢道路遠近及人物性情
以故酌定天時地利運餉進兵機宜不徇眾見決意命將

出師深入撻伐然兵貴相機而動變化無窮惟恐諸將不遵朕指授致失機宜今收復雅克薩初心主於撫綏外國在使之心服不在震之以威近遣親隨侍衛關係等往軍前諄諭之曰兵兇器戰危事古人不得已用之朕以仁治天下素不嗜殺爾其嚴諭將士毋違朕旨以我兵馬精強器械堅利羅刹勢不能敵必獻地歸誠爾時勿殺一人俾還故土宣朕柔遠至意茲一一奉行朕甚嘉焉諸王大臣奏征勦羅刹眾皆難之我

皇上爲根本計獨斷興師羅刹歸誠雅克薩收復悉如

睿算不爽毫髮誠非臣等淺近之人所能仰窺萬一也
且前度羅刹不加誅戮迨大兵壓境又遣關保等嚴諭將
士誠以勿殺

皇上好生之德覆被天下匪獨羅刹戴

恩海外諸邦

莫不傾向

聖化臣等合行慶賀阿爾尼等進奏畢復

出傳

諭曰朕思凡事必周詳審度方收實效不可苟

且從事向者尙書明安達禮輕進至糧餉不繼將軍沙爾
呼達巴海等失計半途而歸遂致羅刹驕恣而我索倫奇
特爾俄樂春等亦懷疑貳朕詢其失機原委一一籌畫乃

復奏功兵法云多算勝少算不勝詎可忽視且兵貴神速
前逆賊吳三桂叛朕思岳州係湖廣門戶遣人指示速戰
始克岳州遂一面進取四川以分賊勢一面密諭大將軍
賴塔從廣西趨雲南於是諸省底定兵革休息然亦在將
軍等奮勉効力倘怠忽不奉行雖有良策亦何益焉所以
平定雲南賴塔之功最有縱有他過爲人控告朕究不加
罪諸王大臣奏三逆叛時在外將士皆與賊持進取無期
我

皇上神謀內運決勝萬里恩威並用勦撫兼施所以負固

巨孽刻日誅鋤又俯念賴塔有功曲

賜保全凡効力

行問者皆歡忻鼓舞而臣等亦莫不感戴

殊恩矣

上復諭曰前關保奏云我兵擬於四月二十八日水陸進發先期雷雨大作至二十六日江水泛溢又風逆舟不得前又二十七日天晴水落二十八日平旦忽轉順風我兵揚帆溯流直上三日之程一朝而至陸路之兵雖疾行不及也又駐扎愛琿兵適當肉食匱乏忽有鹿數萬自山趨下騎者馳射步者捉擊及駕船筏於江中截獲者計五千有餘朕觀此二事預知可以奏功因事未就姑秘不發今

既蕩平故傳諭爾等知之諸王大臣等奏

皇上仁政上合

天心故顯垂鑒佑

國祚綿永萬

年無疆之休於此可卜

上允行禮於是王等率文武官員行三跪九叩首禮尋朋
春等復奏至

上諭覽卿奏官兵星馳直逼雅克薩城下亦以威德招撫
維剎免死放歸克復其城深爲可嘉在事人員從優議敘
投誠羅剎巴西里等安插盛京其被擄之索倫達呼爾人
眾仍各發回原地有喀爾喀厄魯特人口俱察送到部給

發本主

七月壬申

命自烏喇吉林至愛琿設立驛站 先是

郎中包奇等奏自烏喇吉林至愛琿計丈量共一千一百九十五里應設十四驛

上諭驛遞關係緊要凡丈量當以五尺爲度今程途太遠令包奇等再馳驛前往詳加丈量至是包奇等奏自烏喇吉林城至愛琿城以五尺細丈共一千三百四十里應設十九驛

上報可復令每驛設五丁並撥什庫三十名馬二十四牛

三十頭壯丁自盛京甯古塔所轄各驛柳條邊派出馬牛
令盛京戶部照數采買送往

己卯

命釋放被擒羅刹宜番等 將軍薩布素等奏

無底兒河羅刹鄂衣多里遣宜番等四人來誘俄樂春立
克項格等被擒送到

上諭羅刹宜番等應卽正法但大兵攻克雅克薩勢迫來
歸之羅刹旣悉加寬宥不行誅戮今宜番等亦免死曉以
前此釋歸羅刹之故并用羅刹字作書令彼送還我吉爾
蒙阿等毋得再犯邊境其書卽給與宜番等持去立克項

格等所司照例獎賞

八月乙巳

命賞賚征勦羅剎藤牌兵 兵部奏侯林

興珠及何祐等至日旗下兵丁各歸本旗其自山東山西河南調至者令本省官約束以行何祐仍發回原安插處上諭藤牌官兵勤勞懋著官員俟後議敘兵丁令戶部以白金賞賚之

九月乙丑

命甯古塔協領納秦爲愛琿副都統 時

愛琿副都統雅齊納緣事革職故以納秦代之

甲申

命駐兵於黑龍江墨勒根地方 先是

上諭大學士覺羅勒德洪等羅刹侵我邊垂於俄樂春索倫赫真費雅喀擾害居民甚至搶擄人口頻行肆惡朕不忍輒動兵戈數遣使宣諭羅刹仍持遠抗拒侵邊擾民殆無寧息乃發大軍直抵雅克薩城下勢迫始行乞降統兵將帥復遵朕旨宥罪釋歸四十年盤據之眾數日而行擊破收復雅克薩城今已告成功薩布素等前次援兵不進等罪概行赦免進征官兵勞苦暫回烏喇吉林量撥盛京達呼爾等處官兵暫爲鎮守至雅克薩城雖經克取防禦斷不可已應於何處永駐官兵伊桑阿及郎坦往薩布素

處詳加議定以聞築城等事與馬喇相度議畢令馬喇偕
來至是伊桑阿等奏臣等遵旨自納木爾河口至漫
察爾屯詳勘山野空曠多可耕之地其間空郭爾進屯與
黑龍江近應築城至駐防黑龍江之烏喇甯古塔兵五百
人及水手人役又駐防訥木爾兵及家口俱於明春一統
啟行築城照黑龍江例盛京副都統一員兵六百人匠作
酌量派出同築城器具帶往於明春抵納木爾并力修造
再勘墨勒根附近處有嫩江岸之墨勒根屯可以築城俟
訥木爾駐防兵收穫田禾一次墨勒根設兵築城事宜所

或即
今之
哈爾濱

司請 旨

上命議政王貝勒大臣集議議政王等奏言築城設兵等事均如所請黑龍江地方緊要且有船艦火礮等物應發甯古塔兵五百人駐防者不足精選烏喇兵增發其駐防墨勒根兵應停止先派定發往訥木爾兵一千人令增發駐防於空郭爾進

上諭所議尙未周詳止以甯古塔兵發黑龍江不合應以先流徙甯古塔烏拉罪人并發再行明白確議於是議政王等復奏察墨勒根較空郭爾進緊要空郭爾進築城其

停止於墨勒根築城設兵令將軍薩布素及副都統一員
駐扎於此黑龍江設副都統一員其駐防五百兵以烏喇
甯古塔兵參用先流徙甯古塔烏喇罪人俱入兵數發往
今於墨勒根設兵自須增驛令戶兵兩部理藩院各遣官
一員自烏喇吉林至墨勒根自墨勒根至黑龍江宜增幾
驛定議具奏駐防黑龍江副都統鑄印信給之副都統溫
岱納秦孰令駐防黑龍江孰令築城候
欽簡
上允行令溫岱納秦駐防黑龍江副都統博鼎築城築城
兵丁外再量增夫役兼令種地

平定羅刹方略卷一終

平定羅刹方略卷三

康熙二十五年二月甲午

命發藤牌兵及礮具至黑

龍江軍前

上諭兵工二部黑龍江軍前需用火藥礮子所關最要俟
青草時派上駟院太僕寺駱駝二百疋量發火藥礮子及
新鑄之礮再選藤牌兵百人付班達爾沙郎坦率往令內
府佐領護軍校滿令奇宜番等偕行

戊戌

命將軍薩布素等帥師進攻雅克薩城 先是

薩布素奏驍騎校碩克色等往探羅刹情形據回言職至

旁文地方因人少馬疲未抵雅克薩而還途遇奇勒爾慶
定吉爾云羅刹復來雅克薩築城盤踞臣請于冰消時督
修船艦親率官兵相機進剿

上以薩布素所奏乃傳聞之言恐非遣人親抵雅克薩偵
取確音不便遽爾用兵因令薩布素及理藩院郎中滿丕
等確探情形以聞至是滿丕奏臣遣索倫副頭目烏木布
爾代等抵雅克薩城生擒羅刹鄂克索木果訊之云去歲
尼布明頭目宜番令大兵釋歸之額禮克謝率五百餘人
復至雅克薩依舊址築城其城夾木爲之中實以土寬一

丈五尺高一丈木外墁之以泥及訊以糧米可食幾月又云所獲足支二年疏入

上諭今羅刹復回雅克薩築城盤踞若不速行撲勦勢必積糧堅守圖之不易其將軍薩布素等姑停遷移家口如前所請速修船艦統領烏拉甯古塔官兵馳驛赴黑龍江城至日酌留盛京兵鎮守止率所部二千人攻取雅克薩城并量選候補官員及見在八旗漢軍內福建藤牌兵四百人令侯林興珠率往

四月庚寅 命耶坦等參贊大軍務 時

上以耶坦班達爾沙馬喇諳悉地形令赴黑龍江軍前復
諭兵部曰耶坦等旣因諳悉地形遣往俱令參贊軍
務

七月乙巳 命免索倫達呼爾一年貢賦

上諭兵部理藩院曰我兵圍困雅克薩城羅刹勢迫死守
今時序漸寒自墨勒根至雅克薩所設蒙古驛馬冬月飼
秣維艱其免索倫達呼爾今歲貢賦俾之飼秣并修整器
械以備調用至蒙古每驛應設夫馬若干令明愛馬喇等
定議移文索倫總管洪吉郎中滿丕等如數取用索倫達

呼爾夫役與備養之馬又博鼎率往築城種地官兵內選二百人俱暫留墨勒根亦候調用餘悉遣還

己酉 命宣諭鄂羅斯察罕汗

上諭議政王等向者羅刹侵犯雅克薩尼布潮諸地戕我居民邊境騷然曾諭鄂羅斯察罕汗來使尼果來等撤回其眾自後竟不復奏反在在侵犯肆行擾害意尼果來未達前旨于察罕汗復令被擒羅刹持書從喀爾喀地宣諭之亦不覆奏因遣發官兵往雅克薩招撫羅刹不戮一人令其頭目額禮克謝等持書歸去羅刹聞我師言旋復回

雅克薩築城以居朕思本朝頻行宣諭曾未一答而雅克薩羅刹又死守不去或尼布潮諸地阻隔前書未達或雅克薩羅刹皆彼有罪之徒不便歸國俱未可知今問荷蘭國貢使稱伊國與鄂羅斯接壤語言素通其以屢諭情節備悉作書用兵部印付荷蘭國使臣轉發鄂羅斯察罕汗處收回雅克薩尼布潮羅刹于處分立疆界各毋得踰越則兩界民人均得寧居不失永相和好之意察罕汗覆奏時令其使由陸路直來若陸路難通卽以來疏付荷蘭國代奏再依此書發西洋國轉達之

八月丁丑

諭將軍薩布素等戰守機宜

上諭薩布素等曰今天時漸寒河流將結宜每事籌畫預爲之備觀羅刹死守雅克薩城必待援兵之至且冀我兵于流澌時撤回耳目前我兵雖掘濠防緊至隆冬冰合後船艦若何收藏馬足若何飼秣敵兵來援若何撲勦勿令入城爾等其詳加籌畫密以奏聞尋薩布素等奏臣等謹遵
諭旨已于城三面掘濠築壘濠外設木柵鹿角分汛防禦城西村江另設一軍若截江之東西以泊船水險難停恐未流澌時江路有羅刹逸出尼布潮來援復派勦

禦之兵于東西兩岸泊船備之離城六七里上流有港流
漸時卽藏船于內另設一軍守護兼令堵尼布潮援兵至
軍中馬匹有疲羸者一半發愛琿一半發墨勒根令駐彼
盛京官兵飼秣疏入

上諭發墨勒根馬匹之半如交駐彼盛京官兵則更費食
糧可令索倫總管洪吉等飼秣盛京官兵仍行遣還其發
愛琿馬正之半卽令愛琿官兵飼秣

命副都統博鼎率兵赴將軍薩布素軍前 先是博鼎請
率築城官兵二百人進勦事下薩布素等議至是薩布素

奏臣等統率二千一百人所在防禦兵力尙單得博鼎增兵前來殊有裨益

上因命博鼎精選築城及種地官兵二百人賞二月食糧速赴薩布素等軍前令其參贊軍務

九月己酉 命解雅克薩圍 時鄂羅斯國察罕汗遣使上疏其略云謹奉上撫御華夏洋溢寰區率賢臣共圖治理分任疆土滿漢兼統聲名遠播

大聖皇帝曰向者父阿列克席米汗羅爲池曾使尼果來等賫書至 天朝通好以不諳中國典禮語言舉止鄙

陋無文望寬宥之至頌揚

皇帝舛謬失體亦因地處荒遠典禮素昧所致幸勿見罪
皇上在昔所賜之書下國無通解者未悉其故及尼果來
歸問之但述天朝大臣以不還遁逃根特木爾等騷擾
邊境爲詞近聞

皇帝興師辱臨境土有失通好之意如果下國邊民構釁
作亂天朝遣使明示自當嚴治其罪何煩輒動干戈
今奉詔旨始悉端委遂令下國所發將士到時切勿
交兵恭請明察我國作亂之人發回正法卽嗣遣使臣議

定邊界外先令米起佛兒魏牛高宜番法俄羅瓦等星馳
賫書以行乞撤雅克薩之圍仍詳悉作書曉諭下國則諸
事皆寢永遠輯睦矣疏入

上諭鄂羅斯國察漢汗以禮通好馳使請解雅克薩圍朕
本無意屠城欲從寬釋其令薩布素等撤回雅克薩之兵
收集一所近戰艦立營并曉諭城內羅刹聽其出入毋得
妄行攘奪俟鄂羅斯後使至日定議

康熙二十六年正月戊子

遣醫視軍士疾

上諭將軍薩布素等自雅克薩城解圍以來聞軍士間有

疾病者此皆屬滿州精兵朕甚憫焉今特遣醫二人賁藥調治之至羅刹雖無與我對壘但我兵攻雅克薩城從未誅戮其人如城中有患疾之羅刹亦聽其就醫使還彼國傳布德意

七月戊子撤雅克薩官兵還愛琿墨勒根 先是喀爾喀圖謝土汗奉

上諭偵探鄂羅斯國分界使臣消息至是圖謝土汗奏鄂羅斯國使臣已抵境

上諭命薩布素等統率官兵乘時未寒還至愛琿墨勒根

修整器械休養馬匹以度隆冬仍于要地嚴設斥堠并以
察漢汗遣使請和撤還大兵之故曉諭雅克薩城內羅刹
知之

平定羅刹方略卷三終

平定羅刹方略卷四

康熙二十七年五月癸酉

遣內大臣索額圖等與鄂

羅斯來使集議分界事宜

時鄂羅斯察罕汗使臣費

要多羅等至色哈格地方遣人來期我使至彼集議

上命內大臣索額圖都統公國舅佟國綱及尙書阿爾尼
左都御史馬齊護軍統領馬喇往主其議并派八旗前鋒
兵二百護軍四百火器營兵二百每翼前鋒參領一員署
前鋒參領一員署前鋒侍郎二員每旗護軍參領二員署
護軍參領六員每翼火器營協領一員參領一員每旗章

京一員令都統郎坦班達爾沙副都統納秦札喇克圖率之偕往因諭索額圖等曰羅刹侵我邊境交戰于黑

龍松花呼瑪兒諸江據我屬所居尼布楚雅克薩地方收納逃人根特木爾等與天兵築城愛琿兩次進勦雅克薩攻圍其城一切情事馬喇可與諸臣詳言之俾洞曉其故始知朕從事羅刹原委至爾等奉使前往有應酌議者卽詳議以聞索額圖等奏言察鄂羅斯所據尼布楚本係我茂明安部遊牧之所雅克薩係我達呼爾總管倍勒兒故墟原非羅刹所有亦非兩界隙地也況黑龍江最爲扼要

未可輕忽視之由黑龍江而下可至松花江由松花江而
下可至嫩江南行可通庫爾瀚江及烏拉甯古塔錫伯科
爾沁索倫達呼爾諸處若向黑龍江口可達于海又恆滾
牛滿等江及淨溪黑江口俱合流于黑龍江環江左右均
係我屬俄樂春奇勒爾畢喇兒等民人及赫真費雅喀所
居之地不盡取之邊民終不獲安臣以爲尼布楚雅克薩
黑龍江上下及通此江之一河一溪皆屬我地不可棄之
于鄂羅斯又我之逃人根特木爾等三佐領及續逃一二
人悉應索還如一一遵行卽歸彼逃人及大兵俘獲招撫

者與之畫疆分界貿易往來否則臣當卽還不與彼議和矣

上允之是日索額圖等啟行未抵色哈格地方適喀爾喀厄魯特爭戰報至

上卽遣侍衛夸塞關保往追索額圖等令其退駐喀倫地方以道阻緣由遣人曉諭鄂羅斯使臣于是索額圖等以前情作書令前鋒參領索羅希等送往伊等遂暫回喀倫尋鄂羅斯使臣答書稱已遣人由尼布楚赴京索羅希等以書奏覽

上隨召索額圖等還

康熙二十八年四月壬辰

復遣內大臣索額圖等與

鄂羅斯使臣會議

時鄂羅斯使臣所遣人至言其大使

者費要多羅等前來尼布楚地方

上乃遣索額圖等赴尼布楚就議官兵同往者量增于前

又命調黑龍江兵千五百人各帶杖械由水路赴尼

布楚與索額圖等會索額圖等奏言尼布楚雅克薩旣係
我屬所居地臣等請仍如前議以尼布楚爲界此內諸地
均歸于我

上諭今以尼布楚爲界必不與鄂羅斯則彼遣使貿易無
棲託之所勢難相通爾等初議時仍當以尼布楚爲界彼
使者若懇求尼布楚可卽以額爾古納爲界是日索額圖
等啟行

十二月丙子

遣官立界牌于格爾弼濟河諸地 內

大臣索額圖等抵尼布楚城與鄂羅斯國來使費要多羅
額禮克謝會議彼初猶以尼布楚雅克薩爲所擴之地固
執爭辨索額圖等以鄂嫩耳布楚係我國所屬茂明安諸
部落舊址雅克薩係我國人阿爾巴西等故居後爲所竊

據細述其原委開示之因直斥其侵犯之不復宣諭

皇上好生德意于是費要多羅等及鄂羅斯國人眾皆歡呼誠服遂出其地圖議明分界事宜共相盟誓永歸和好索額圖等以聞

上命議政王貝勒大臣集議議政王等奏言羅刹潛據雅克薩諸地擾我虞人三十餘年矣

皇上念其冥頑無知不忍興師勦滅發官兵駐黑龍江待其悔罪因執迷不悟乃命攻取雅克薩城所俘概行釋放未幾羅刹重至雅克薩築城盤踞復令官兵圍困勢

極窮蹙會其主遣使乞和

皇上卽許撤圍兼令大臣以義理曉譬之鄂羅斯國人始
感戴 覆載洪恩傾心歸化悉遵往議大臣指示定其
邊界使東北數千里從未入中國之地咸歸版圖此皆我
皇上睿慮周詳德威遐播之所致也應于議定格爾弼濟
河諸地立碑以垂永久勒滿漢字及鄂羅斯喇地訥蒙古
字于上今雖與鄂羅斯和好邊界已定但各省有官兵駐
防例仍照前議于墨爾根黑龍江設官兵駐防疏入
上從之尋遣官立碑于界其碑曰 大清國遣大臣與

鄂羅斯國議定邊界之碑

一將由北流入黑龍江之綽爾訥卽烏倫穆河相近格爾
弼濟河爲界循此河上流不毛之地有名大興安以至于
海凡山南一帶流入黑龍江之溪河盡屬中國山北一帶
之溪河盡屬鄂羅斯

一將流入黑龍江之額爾古訥河爲界河之南岸屬于中
國河之北岸屬于鄂羅斯其南岸之眉勒爾喀河口所有
鄂羅斯房舍遷移北岸

一將雅克薩地方鄂羅斯所修之城盡行卸毀雅克薩所

居鄂羅斯人民及諸物用盡行撤往察漢汗之地

一凡獵戶人等斷不許越界如有一二小人壇自越界捕獵偷盜者卽行擒拿送各地方該管官該管官照所犯輕重懲處或十人或十五人相聚持械捕獵殺人搶掠者必奏聞卽行正法不以小故沮壞大事仍與中國和好毋起爭端

一從前一切舊事不議外中國所有鄂羅斯之人及鄂羅斯所有中國之人仍留不必遣還

一今旣永相和好以後一切行旅有准令往來文票者許

其貿易不禁

一和好會盟之後有逃亡者不許收留卽行送還

皇上仁德覃敷怙冒六合凡窮荒絕域含靈受性之倫靡不涵泳

聖化飲德而食和恬然各得其所惟鄂羅斯

國羅利一種頑梗無知自作弗靖越我邊界竊據尼布楚雅克薩諸地擾害附近居民以致黑龍江松花江一帶索倫達呼爾諸虞人皆不得安息先順治年間累發官兵進討未獲殲滅迫我

皇上親政卽念羅利所據去我朝發祥之地甚近不可不

速爲平定而平定之計與其創以兵威不若服以德化故
于康熙十五年間因鄂羅斯遣使來貢方物隨優賞使臣
仍賜之 溫綸令其嚴禁羅刹毋擾邊陲許以貿易通
好乃竟未奏覆而羅刹反侵入淨淡里烏拉等處
皇上特遣大理寺卿明愛等諭令撤還顧遷延不去肆行
殺掠鴟張寢甚

皇上尙未思以兵加之但 調烏拉爾等處官兵駐鎮
愛輝以防其滋蔓更屢行開示以冀其曉悟夫何羅刹執
恣如故稔惡不悛

卷之四

皇上以其性同禽獸非威德兼施勦撫並用終未卽靡然
帖服爰授 成算于都統公朋春等董率將士進取雅
克薩隨播 好生之仁遣侍衛關保傳 諭諸將帥

城下之日毋戮一人已而我官兵水陸並進薄城一戰羅
刹果震懼窘迫稽顙乞降朋春等欽遵 諭旨不誅其

眾悉爲放還苟羅刹稍有人心霑被 鴻恩自宜戢志

屏迹無復越境不意反側靡常乘我兵凱旋之後又潛入
故地竊處其中

皇上復命將軍薩布素等以兵圍之勢已窮蹙而 聖

心慈愛本無意屠戮欲從寬釋會鄂羅斯察漢汗上疏謝
過遣使請和遂命解雅克薩之圍特遣內大臣

索額圖等赴尼布楚與鄂使會議既索額圖等抵彼以大
義詰責其罪并宣布朝廷寬仁至意鄂羅斯始感戴

高厚中心悅服分疆設誓聽命惟謹于是邊鄙之民
皆獲安堵永無侵暴之患焉夫鄂羅斯從昔不通中國其
人最獷悍難馴今一旦弭首順從傾心向化自極北不毛
之地興安嶺以內數千里境悉歸版圖由是觀之聖
德神功巍巍蕩蕩誠迴越千古矣至于出師之時眾皆以

道遠爲難賴

皇上熟計於數年之前臨事不撓毅然獨斷又復遠探地
形以便進止設戍屯種以資戰守修造運艘以足兵食置
立驛站以速軍情屢授籌策于將帥而機宜無失時
頒犒賜于士卒而奮勵有加事舉勿疑神謨至
爲英果功成早計
有也總之
睿慮詢極夔深此亦從來史冊未

皇上至仁如天
大智如神故
聲靈普被而鴻濛
未闢之土盡入提封
德澤周流而三五未服之方咸

感 教化中庸曰舟車所至人力所通天之所覆地之
所載日月所照霜露所隊凡有血氣者莫不尊親蓋此之
謂也

平定羅刹方略卷四終